

Buvddas

Odne lea mánáidgárdi vuolgimin buvdii gávppašit.

Sii fertejit gávppašit dasgo ihttin áigot sii láibut bulláid. Juhán, gii bargá mánáidgárddis lea čállán báberbihtážiid maid sii galget oastit. Juohke mánás lea dakkár gávppašan-listu lupmas vai beassá dárkkistit muitet go visot.

Dasa lea čállon: Nisojáffut, jeasta, vuodja, sohkar ja mielki.

Dál leat mánát čuožžilan ráidun, guovttis ja guovttis giehtalágaid. Sii leat gergosat vuolgit buvdii.

Sii vázzet ráidun.

Go jovdet buvdii de váldá Juhán gávppašan-vovvna man sisa sáhttet borramušgálvvuid bidjat. Buvddas leat unna gávppašan-vovvnat maid muhto daid eai áiggo dán háve geavahit.

-Váldet dal dan gávppašan-listu ja lohket mii dasa lea čállon, dáhttu Juhán.

Juohkehaš nahkiha gieda lupmii váldit gávppašan-listta.

- Mun in máhte lohkat, dadjá muhtun.

- Ii dat daga maidege, mii han geahččat ovttas. Mii lea čállon bajimužžii? Jearrala Juhán.

-Nnnniisooo, stáve Ovllá.

-Nisojáffut, dadjá muhtun.

Nu fal: Gos son dat nisojáffut leat? Dán buvddas vuvdet sihke huksendávviriid, biktasiid ja borramušgálvvuid. Sii vázzet ilduid gaska dassáži go bohtet dohko gos leat borramušgálvvut. Dál sii leat gávdnan buot maid dárbbášit, sihke nisojáfuid, jeasta, sohkkara, vuoja ja mielkki.

Maid son buvdabargit barget beivviid? imaštii muhtun.

- Mii han sáhttit jearralit don buvdabargis gii kássas čohkká.

Mánát bardet gálvvuid diskka ala. Buvdabargi geassá gálvvu máksinkássa meattá, dat civkkiha juohke háve go gálvvu rohte meattá, civ, civ,civ...

- 352 kruvna, dadjá buvdabargi gálvvut mákset.

- Bija mánáidgárdde rehket ala dien, dáhttu Juhán.

Buvdabargi dahká dan.

- It ban dárbbas máksit dáid gálvvuid ovddas, jearrala okta.

- De fertet máksit. Mánáidgárddit sáhtte vealggás váldit gálvvuid ja de sádde buvda manjá rehkega mánáidgárdái. Dalle mii máksit daid gálvvuid maid dál váldit.

- Eadni gal láve koarttain máksit. Boahtá go dalle rehket?

- Dalle gal ii boađe, dadjá buvdabargi.

- Maid buvdabargit barget beivviid, muitái Ovllá jearrat.

- Mii čohkkát dás kássas ja váldit mávssu gálvvuid ovddas. Go eai leat olbmot gávppašeamen de mii deavdit gálvvuid ilduide. Muhtumin fertet maid bassat daid ilduid gos gálvvut leat. Dasto fertet mii hatti bidjat gálvvuide vai dát mašiidna máhtta rehkenastit man ollu gálvvut mákset oktiibuot, go dii gávppašehket. Ja de leat ildoravdii merken galle kruvna gálvu máksá.

- Mo ban dan dahkabehtet?

Buvdabargi váldá njálggusbose mii lea diskka guoras. Jos geahččabehtet dá, de lea juohke gálvvus diekkár sárgát. Diet sárgát leat dakkár kodat mat muitalit man ollu gálvu máksá. Juohke háve go bijan gálvnu dán kássa meattá, dat lohka dan koda ja de dat civkkáda. Dalle lea lohkan man ollu gálvu máksá. Jos ii civkkát, de ferten deaddit dieid unna tállaid mat leat dies vuolábealde, diet maid muitalit ollu gálvu máksá. Ja go de lean buot din gálvvuid bidjan kássa meattá de lea dat rehkenasttán man olu máksá oktiibuot.

- wow... gal diet gal orro váttis.

-Ii leat nu váttis go dan oahppá.

Ammes, mun gal ferten din rábmot. Mun oidnen dii leiddet nu čeahpit, vácciidet čábbát buvddas ehpetge viegadan. Dasa mun gal liikojin, dadjá buvdabargi

- Giitu!

Juhán cokkai gálvvuid lánkii ja de vuot vázziledje sii ráidun mánáidgárdái.

- Manne son buvddas ii galgga viegadit?